


# NA ZIBA

 Lu sicaba se si na ni lithonolo hahulu fa kuba mo kakusasana cwana, ka kuba baba pila mwa lifasi, ka kubona nako yeñwi yende ya Zuho. Zuho kamita itisanga lika ze—ze nde hahulu ku luna, sepo yenca. Mi—mi ha ki bunde ni boo!

<sup>2</sup> Mi ha ne Ni sweli fela kukena mwa sibaka kwa mulaho kwani kakusasana cwana, kuna ni yana ni katani mi ali kuna, “Muzwale Branham, wa ziba kuli—kuli mbututu yomunyinyani, kamba mwana yomunyinyani kamba mutu yomuñwi cwalo, yana lapelezwi kwa Chautauqua ñohola, yana nani toho yene ntanile, ni misinga ni zeñwi cwalo ku yona.” Ali, “Mbututu yani na folisizwe, mi uteni mwa muyaho mo kakusasana cwana, mane kaniti, mi uinzi mo kakusasana cwana.” Kacwalo ki zende, lu kaba ni bupaki nyana kuzwa foo mwendi lu si ka kalisa kale sebelezo yeñwi. Mi lu sicaba se si tabile hahulu.

<sup>3</sup> Cwale Ni ka kupa Muzwale Neville haiba uka bala Liñolo mwa Mateu kamba Luka, leliñwi, ka za zuho, haiba ha mu si ka ibala kale. Ukile waibala fateni, muzwale? [Muzwale Neville uli, “Batili.”—Mu.] Kacwalo, ha lunze luitukiseza za litapelo.

<sup>4</sup> Mi cwale ka kulatelela sebelezo yee, ku kaba ni sebelezo ya foliso. Kasamulaho wa sebelezo yee, kona mu kaya kwa mukushuko wa mina. Mi, kasamulaho wa seo, lu ka kuta hape ka naini seti ni kukala sebelezo yeñwi. Mi cwale lisebelezo za foliso lika latelela mwa mulaho. Mi kona ku ka tatami lisebelezo za kolobezo kasamulaho wa fani.

<sup>5</sup> Mi ha ki nako kwa bunde ni yeo ya kolobezo! Oh, mawi! Zuho! Ki kabakaleo ha lu kolobelizwe, bakeñisa kuli U zuhile hape.

<sup>6</sup> Na hupula lu si ka ba kale ni sibaka sa ku kolobeleza kwanu, Ne ni ba isanga kwa nuka kwale, kamapakela, ni kakusasana wa mbundu, ni ku kolobeza sicaba kwa nuka kwani. Kuna ni sesiñwi ka sona, fela, ki nako yende. Zuho, ki nako yende hakalo.

Ne ni sweli kotalimela Muzwale Pat Tyler yainzi fani.

<sup>7</sup> Ne ni sweli fela kuikambota ni mutu yomuñwi maabani manzibwana. Kuli, mukopano wa luna wa mafelelezo mwa Oklahoma, Ne ni lika cwalo, na lika cwale (mi Ni ka zibahalisa se) kuikinela kwa tuko kufitela Mulimu ani bizeza kueza cwalo, bulumiwa bwa kale bwa temuho, kakuli Ni nahana kuli (makalelo) ki—ki bulumiwa bobunca bo bu sweli kukalisa.

<sup>8</sup> Busihu bobuñwi, hakuna mutu ya ziba sika ka sona, Ne ni li tatubile ku mwana ya na taha fa katala, yana pepilwe ali sibofu, mbututu ya cwalo; mi neli sibofu luli, mwendi neli mushimani

wa lilimo ze lishumi ka ze silezi za kupepwa. Mi a si ka huwa kale kuli, “Muzwale Branham, Na bona!” Mi fani, mi Pat neli. . . Ty- . . . inza yemi fakaufi, bukaufi ni mushimani yani, meto a hae ha to kwaluha nako yapili mwa bupilo bwa hae. Mi kacwalo Ni sepa kuli mina mo, ka tibeledo yetuna, na kasibili, Ni libelela nto yeñwi, Mulimu ku lu ezeza zona, ni ku lutisa fa siyemo sesiñwi kufita se luli ku sona.

Halu inamiseni litho za luna kwa tapelo.

<sup>9</sup> Ndata luna Yomunde wa Lihalimu, ha lu kopani kakusasana cwana, mo mwa keleke yenyinyani yefumaneha kwa tuko ni mukwakwa, lu itumezi hahulu ku Wena, ka se nto ye italusa ka luna, mi sihulu la Zuho kakusasana cwana. Kambe ne ku sina Zuho, ne lu si ke lwaba mwa buino boluli ku bona kacenu. Kuli, Zuho ki yona ye ne swaile lisepiso za Mulimu kaufela. Ne lipakile lika zeo ku luna. Lika kaufela Za sepisize, kaufela zona ne li bile za niti ka la Zuho. Leliñwi la mazazi amatuna hahulu a mikiti yelukona kuba ni yona mwa silimo! Mi lu kupa, Mulena, kacenu, kuli U ombaombe lipilu za luna halunze luinzi cwana, lu libelezi, mi mwatasi kulibelela Moya o Kenile, Yana tile kasamulaho wa Zuho, kutaha fahalimwa lipilu za luna kuto lu ombaomba, ni ku kutisa tumelo yaluna, mwa likalulo zetuna zemata, kuli lu zamaye bupilo bwa lu lukiselize Jesu kuli lu zamaye ku bona.

<sup>10</sup> Lu lapelela mutu ni mutu, mi sihulu ku bani baba kwalezwi kwande baba palelwa kutaha kwa lisebelezo kai ni kai kacenu. Mulimu, abe ni bona. Mi cwale—cwale Zuho ye ifumane Zuho ya niti ku bona, ibe kuzuha fa mumbeta, mi buiketo bobunca bo ba si ka ziba kale fateni mwa bupilo. Lumeleza cwalo, Mulena.

<sup>11</sup> Mi cwale mukutazi kaufela, mutanga kaufela Yona ni mwahala lifasi kacenu, baba nyakalala kupuzo tuna ye, mi hababe ni tiisezo ni kutiya kwa Mata, kutisa kwa likopano za bona (ngu ye libelela) Sico seo Mulimu a bulukezi sicaba sa Hae. Lumeleza cwalo, Mulena. Lu libelela kalulo ya luna, ka buikokobezo, ka Libizo la Mulena Jesu Kreste. Amen.

<sup>12</sup> Ni ka kupa Muzwale Neville cwale kuli abale Mañolo a zuho. [Muzwale Neville uli, “Mateu 28,” mi ubala Liñolo le li tatama—Mu.]

*[La pumulo ha li felile, masa ha patalala a lizazi la pili la sunda, kwataha Maria Magdalena ni Maria yomuñwi ku to bona libita.]*

*[Mi, amubone, mi he zikinyeho ye tuna ya lifasi yaba teni: kakuli lingeloi la Mulena ne li zwile kwa lihalimu, ku to pikulusa licwe, mi la ina fahalimwa lona.]*

*[Sibupeho sa lona ne si bonahala sina lumonyi lwa pula, siapalo sa lona ili se si sweu sina litwa.]*

*[Balibeleli kabakala ku li saba ba ngangama, ba ba sina batu ba ba shwile.]*

[Kono lingeloi la bulela kwa basali, Mina musike mwa saba: kakuli Ni ziba kuli mubata Jesu, yana kokotezwi fa sifapano.]

[Ha yo mo: kakuli u zuhile, mwa na bulelezi. Mu to, bona sibaka mwa na lobezi Mulena.]

[Mi mu akufe, mu yo bulelela balutiwa ba hae kuli uzuhile kwa bafu; mi, amubone, mi wa itangeta kuya kwa Galilea; mu ka yo mubona kwateni: kifo, Ni mi bulelezi.]

[Mi cwale basali ba zwa kapili kwa libita ka sabo ni ka tabo yetuna; mi ba mata kuiseza piho yeo kwa balutiwa ba hae.]

[Mi ba si no ya ku yo bulelela balutiwa ba hae, amubone, Jesu ki ha itahisa ku bona, ali, Mu lumele. Bona ba sutelela ku yena ba mu swala kwa mahutu, ba mu kubamela.]

[Cwale Jesu ali ku bona, Mu si ke mwa saba: mu yo bulelela banabahesu kuli ba ye kwa Galilea, ki mo ba ka ni bona kwateni.]

[Basali ha ba zamaya, amubone, balibeleli ba bañwi ba taha mwa munzi, ba yo bihela baprisita ba bahulu ze tahile kaufela.]

[Bao ba kopana ni ba bahulu, mi haba lelisani, ba fa masole mali amañata,]

[Inze bali, Mu bulele kuli, balutiwa ba Hae ba tile busihu, mi ba mu uzwize luna ha lu lobezi.]

[Mi mubusisi ha ka utwa taba yeo, lu ka mu kolisa, lu mi tokwise lipilaelo.]

[Bao banga mali, mi ba eza mo ba laelezwi: mi taba yeo i sa tiile mwahala Majuda ni kacenu.]

[Balutiwa ba ba lishumi ka alimuñwi ba ya kwa Galilea, fa lilundu lene ba laelezwi ki Jesu.]

[Mi ha ba mu bona, ba mu kubamela: kono ba bañwi ba palelwa kulumela.]

[Cwale Jesu a sutelela a ba bulelela, kuli, Ni filwe bulena kaufela mwa lihalimu ni mwa lifasi.]

[Mu ye cwale, mulute macaba kaufela, mu ba kolobeze ka libizo la Ndate, ni la Mwana, ni la Moya o Kenile:]

[Mu ba lute ku mamela ze Ni mi laezi kaufela: mi, amubone, Ni inzi ni mina ka mazazi kaufela, kuisa kwa mafelelezo a lifasi. Amen. Hakuna manzwi fa tepu.]

13 . . . aekeze limbuyoti za Hae kwa palo ya Linzwi la Hae.

14 Cwale lu ka bulela cwana, lwa zibahalisa hape, kuli lisebelezo, ni mwa kakusasana, lu ka zwelapili ka naini seti,

lu sa zwa fela ku woo, ki . . .sebelezo ya kakusasana cwale. Mi kipeto lubiza sebelezo ya kakusasana yaluna ye. Mi ki luna ba, luna ni lika zetuna za kuzibahaza ku mina kaza—kaza mikopano yefitile. Mi lubata kuli mina ba bakula ni baba ziyelehile, kaufela mina, kutaha ka tumelo kakusasana cwana, kulumela kuli Jesu ya zuhile yo wa pila kacenu, mi Yena fela ki Ya swana sina mwa kile A bela sapili. Ha si ka cinca ni hanyinyani.

<sup>15</sup> Cwale Ni bata kubala siemba nyana sa Liñolo fa, se si fumaneha mwa kauhanyo ya 19 ya Jobo, ku kalela ka timana ya 15.

*Ba ba inzi mwa ndu yaka, . . .ni bo na mukuka baka, ba ni talima inge ni mutu usili: Ni muzwahule ku bona.*

*Ha ni biza mutanga ka, ha ni alabi; mane Ni ha ni ka mu kupa ka mulomo wa ka hana taba.*

*Moya o zwa mwa sifuba sa ka wa anka ku musala ka, bana ba ka ba nyikwa kabakala munko wa Ka.*

*Mane, ni bana babanyinyani ba ni shubula; Ha ni nanuha, ba bulela ka kashwau.*

*Ba makunutu aka ba ni toile: ni bene Ni olisa kaufela ba ni fetuhezi ku ni lwanisa.*

*Masapo aka alamatela fa litalo laka, mi Ni banduki ni litalo la fa meno aka.*

*Amu ni utwele butuku, amu ni utwele butuku, Mawe mina balikani baka; kakuli lizoho la Mulimu li ni natile.*

*Kiñi se mu ni ndongwama sina Mulimu, ha mu kolwi kiñi ka nama ya ka?*

*Mawe kabe ku ka konahala kuli manzwi aka a ñolwe cwale! kaba ka ñolwa mwa buka!*

*Kaba ka ñolwa ka siñoliso sa sipi ni ka loto ku a falaula fa licwe kamita.*

*Kono Na . . .ni ziba kuli muliululi wa ka wa pila, mi ni kuli kwa mafelelezo uka yema mwa lifasi:*

*Mi he litalo laka . . .ni ha li sinyehile cwalo, ni ha ni ka tokwa mubili Ni ka bona Mulimu:*

*Ni ka Mu bona isali na, . . .ni mu bone ka meto aka, mi isi yomuñwi; ki mo ishukelezwi pilu yaka.*

<sup>16</sup> Ni bata kunga tuto kulo foo, ye fumanwa mwa Jobo 19. Na Ziba.

<sup>17</sup> Mupatriareka ka nako ye nali sina mo luinezi luna kacenu. Na bile mwa butata bobutuna, sina mo lu li bizeza, “mezi a buliba,” mi bali mwa ñalelwa. Mazazi amañata na ina fa libunda la mufuse, mi na lika kufumana manzwi a ku mu ombaomba, kulika kufumana sika sene si ka mufa kutiya, ni sesiñwi sene si

ka mu—si ka mu ombaomba hana bona bupili bwa hae habuya bu nyana kuzwa ku yena.

<sup>18</sup> Sibaka sapili, nali muuna muhulu, mwendi wa lilimo ze nainte za kupepwa, mi u natilwe ka lizoho la Mulimu. Cwale, lu ziba kuli Mulimu na na si ka mu nata ka lizoho la Hae, kono neli Mulimu yana lumelelize Satani kuli amu swale. Mulimu fela una ni babeleki bakueza lika. Mulimu ha bata kuli bumaswe bu ezahale, U luma fela Satani kuli eza. Mi haiba Ubata kuli zende li ezahale, Una ni batanga ba Hae ba lumanga kuli eza.

<sup>19</sup> Mi Satani a swala Jobo ka mulelo, wa ku mu lika, kakuli yena ni Mulimu nebana ni kañi ka zona. Mi Mulimu abulelela Satani kuli, “Nina ni mutanga ka mwa lifasi, hakuna ya swana ni yena. Kaufela se Ni mu bulelela, wa si eza. Ki muuna ya petehile, mi ki mutu ya lukile.”

<sup>20</sup> Mi Satani ali, “Haiba Ukona fela ku ni fa yena, Ni ka eza kuli mane a Ku lwahe unzo Mu talimezi.”

<sup>21</sup> Jobo, kusina kuziba lika ze kaufela ze ezahala, za tisa mushemi yani mwa ñalelwa yetuna. Ibo, ka mukwa omuñwi, kaufela ha li to zwa ku yena, niteni na sa bulukile sibaka sa hae ku—ku Kreste. “Ni ziba kuli Muliululi wa ka wa pila,” a bulela.

<sup>22</sup> Cwale lwa tahanga mwa libaka zani. Kaufela luna lwatahanga ku zona. Mi Ni lumela cwalo kacenu, kuli lu kopanezi mo kwa sika sesiñwi se si swana sani. Kaufela luna lu inzi fa mabunda a mufuse. Luna ni matata a luna, ni kupahama kwa luna ni kushetumuka kwa luna, mi ni—ni linako zaluna ze maswe, ni matuku a luna, ni kuopa toho kwa luna, ni kuswaba kwa luna. Kacwalo lu taha sina cwana, kakusasana wo, kakusasana wa Zuho cwana, ku to fumana manzwi a ombaomba, sina Jobo ya na lika kubatisisa kwa balikani ba hae.

<sup>23</sup> Hakuna ni yomukana wa bona yana konile ku mu ombaomba. Bakeñisa butata bwa hae, neba sweli ku mu tama litaba ka kuba muezalibi wa kwa mukunda. Mi, butata bwani kaufela, Mulimu ataha ku to mu tusa.

<sup>24</sup> Jobo na sweli kubuza lipuzo. Mi kuya ka mwa na zibela, isiñi fela matuku a hae ni limbongola za hae, ni butata ni kuopa toho, kuzwa kwa kulatehelwa ki lubasi lwa hae ni sifumu sa hae kaufela, nelili fela bukaufi ni kunga bupilo bwa hae; kono nali muuna muhulu, ya sa supezi luli za ngana, ni ka kuziba kuli na ka ya mwa libita la mwatasi. Mi, ka kuziba kuli, na lumela kuli nekuna ni mutu yana mu tisize mwa lifasi, na si ka taha ka yena fela anosi. Mi na ziba kuli uzwile ku ndatahe ni mahe, kono, niteñi, ndate yani ni mahe nebana ni yana ba tisize. Mi nelika kuta kwa mulaho kuya ona cwalo mane ni kwa makalelo, “Ki mañi yana tisize, wapili?”

<sup>25</sup> Mi cwale a komoka taba ye. “Ki nto ye komokisa kuli ki Na yo fa, inge ni zamaya zamaya, nina ni bupilo bo bu fa halimu kufita bwa lifolofolo, ni bupilo bo bu fahalimu kufita bupilo bwa

limela.” Kono ni cwalo lufumana kuli naize, “Haiba kota ishwa, ika pila hape. Mi haiba pa—pa palisa ishwa, ika pila hape.” Kono abulela kuli, “Mutu ha lobala, u pumehelwa ki moya wa hae, mi ukai hape? Bana ba hae ba to mu silisa ni ku mu fa likute, mi a li utwi.” Mi na sweli ku komoka, “Neli butata mañi kuli—kuli Mulimu ukona kutuhelela bupilo bo bu cwalo bwa kupila hape, ze swana sina lipalisa ni limela, kono mutu na sike kupila hape?” Zeo kaufela za mu kataza hahulu.

<sup>26</sup> Mi haiba lu ka nga fela taluso ya se kakusasana cwana. Mi seo kona se lubezi teñi mo. Lu utwile likande la Zuho, fa ni fa, ni kubala ka za lona ku kuta kutela; mi kacenu, fa litukiso za silimba sa mina, muka utwa bakutazi baba shutana baba ka ambola fateni. Kono se Ni hupuzi, kwa sicaba saka sesi likanu kakusasana cwana, Mulena uni file, Ni ka italima ka mubonelo usili haiba Ni kona, kutaha fa sibaka sakuli: Ki kabakalañi ha lu tahelwanga ki matata aa? Ki sikamañi se si tisanga lika ze? Ki kabakalañi kanti Mukreste hakona kuba ya mbemukile? Kiñi lika kaufela halisike, za zamaya fela hande ku Mukreste? Kono ha li cwalo, mi lwa ziba cwalo.

<sup>27</sup> Mi fokuñwi luna ni matata amañata hahulu lu saba fela Bakreste kufita hane lu sa li baezalibi. Kakuli, Ku ñozwi kuli, “Ki amañata matata a ya lukile, kono Mulimu u mu lamulela ku ona kaufela.” Mulimu na sepisize matata amañata, maikuto amanca, ni lika lika zenca ze ka fitelela kutwisiso ya luna, kono zeo kaufela li ezahalelanga fela kwa bunde bwa luna. Fela ha lukoni ku li utwisisa, kakuli, haiba ne luka li utwisisa, kona kuli ne isike yaba tumelo ku luna; ne luka zamaya ni kutwisiso fela. Kono lu eza cwalo, mi luna ni yona, mi lu lumela ka tumelo, Linzwi la Hae, kuli li ka sebeza lika zende ku luna. Haiba neluna ni ku utwisisa seo kacenu, mwa nako ya—ya kakusasana cwana. Kambe ne lu ka kumalela seo matata aluna kaufela. . . Mi hakuna ni yomukana wa luna ya ilile matata. Mi haiba lukona kulemuha kuli lika zani ki za bunde fela bwa luna!

<sup>28</sup> Ku ñozwi, ku leliñwi la Mañolo mwa Bibebe, kuli, “Miliko itiswa ku luna, ki yeminde ku luna kufita gauda kasibili, kakuli ki Mulimu ya lufa miliko yeo.” Ha se lubile libyana za Hae, buipuleli bwa luna ni kolobezo ya luna, ni sepiso ya luna ya kuzamaya mwa bupilo bwa Hae, kona kuli muliko kaufela o taha fahalimwa luna ki wa ku lu petahaliseza kwa kanya ya Hae. Ki ku lu tisa kwa sibaka foo Mulimu akona ku I keza wa niti luli ku luna kufita Mwa kile abela muliko u si ka lu tahela kale.

<sup>29</sup> Ni bata ku kopana ni Jobo kakusasana cwana, ka kubulela kuli Ni pilile nako yetelele hahulu ka kuziba kuli yeo ki Niti. Ni li boni mwa bupilo bwaka tota, kuli ka nako kaufela ha ku taha nako yetuna, ze Ni palelwa kupotoloha, kamba kushela mwatasi kamba kuli pahama fahalimu, Mulimu uka panga nzila, ni kuzwa ka kanya yetuna. Ni komokanga fela sishemo sa Hae mo si ezezanga lika, kono Yena u peta lika.

<sup>30</sup> Mi amuhupule, mwa lika ze kaufela, Satani ulika ku lu tisezanga kuikalelwa, ni ku lu filikanya, kueza kuli lukale kunahana kuli, “Oh, kiñi sa *kuli* ha si ezahala? Kiñi hane Ni si kaba sa *kuli*?”

<sup>31</sup> Mazazi nyana afitile hane Ni taha kuzwa mwa sibaka sesinde hahulu, ili sibaka sesinde luli ku ze Ni kile na bona fateni mwa bupilo bwaka, neli muyaho omutuna wa muzwale wa luna, Oral Roberts. Hane Ni boni licwe leli swalani lani, mi kusina nihaiba lihaulo ku ona, ka mo ne uyahezwi! Mi Ni bile mwa Hollywood mi Ni bile ni mwa mileneñi ya malena, mi Ni bile mwa libaka kaufela ko ni bile kaufela, mane, ni kupotoloha lifasi, ni lika zende kaufela, libaka zetabisa kaufela ni kwa lapa, kono Nali kuba ni bone sika kaufela, sibaka sifi kaufela, ka kubapisa, ni sona, hakuna sibaka sisili kaufela. Kuli mane moya wa mawaya a aluminiamu yenyinyani a—a inzi mwahali hamoho, mi, oh, Na li kuba ni bone fateni sika sesinde hahulu cwalo mwahala bupilo bwaka kaufela. Ha Ni to kena mwani, mi nanga mazoho aka ni kuswala misumo yani, mi—mi licwe lelituna; kaufela zona mwa mufuta wa bulalu bwa Ndate, Mwana, ni Moya o Kenile, ni—ni buino bwa zona. Lika zeo kaufela! Kona hane Ni sa zo zwa fela ku Muzwale Tommy Osborn, ni kubona misebezi ya hae yemituna, kwateni ya Mulena.

<sup>32</sup> Na yema fande, na talimela kwa mulaho wa muyaho, mi Na hupula kuli, “Mulimu, kaniti Ni bile muipi, kaniti se Ni bile linyambangeti, kokuñwi; kakuli, bulumiwa bwa baana ba buzwi ku bwaka.” Mi Na hupula kuli, “Sikamañi? Mwendu ha Ni se piwi, Mulena, kuli ha U si ka ni sepa ka kuba ni nto ye cwalo. Nihaiba mwa bunyinyani, bwa madollar a likani U ni tuhelezi kulifela mikopano ni lika zeñwi kaufela, cwale balika ku ni isa kwa tolongo bakeñisa zona. Mi kiñi ha Ni li muipi ya cwalo, kamba kiñi ha Ni li mutu ya sa sepahali cwalo?”

Ne nili fa libunda la mufuse, sina Jobo wa kale mwa na bezi.

<sup>33</sup> Hane Ni yemi fande fani, mane inge ni palelwa fela kubuyela hande, bakeñisa bukwala bwale; kuli mushimani ya botanile ya pepezwi mwa mukokolombwa, wa mu Pentekota, kuli na ka kona kueza ni kutisa sani kuba muyaho omutuna cwalo. Mi Na hupula kuli, “O Mulimu, mwendi ha Ni swaneli.”

<sup>34</sup> Ona fani fela Linzwi lelisisani la taha fafasi kufita mwa makozwana ani, mi lali, “Kono Ni siemba sa hao.”

<sup>35</sup> Mi Na hupula kuli, “O Mulena Mulimu, oh, tuhela seo sibe fela ona cwalo, mi, Mulena. Na . . . kakuli ha Ni koni kuba ni butali bwa kuzwiseza pili musebezi omutuna sina wani ku Wena. Mi Na ni—ni mutu ya si ka ituta. Kono, haibile fela Wena u siemba sa ka, Ni wa Hao, mi Uka ni zamaisa. Hani koni ku itamaisa ili na. Kono, O Mulena, ni zamaisa!”

<sup>36</sup> Ki liholo ze sabisa ze lu sineleketa mwa lishabati la za moya zani. Neli mwa Bibebe. Mi muhupule, hakuna taba kamba

manyando a cwani, Satani hakoni kunga bupilo bwa hao konji haiba Mulimu ufelize ni wena. Hakuna sika se si kona kuezahala ku wena konji Mulimu ha lumeleza. Hakuna bumaswe bo bukona kutaha konji haiba Mulimu a bu lumeleza. Mi ki kwa bunde bwa hao Ha sweli kueza zeo. Halu nahaneñi.

<sup>37</sup> Kwani muunda hane u ti lo sinya lifasi, ne li si ka sinya Nuwe. Nuwe na sa koni ku sinyiwa, kakuli Mulimu nana ni musebezi wa na lukela kueza.

<sup>38</sup> Zazi leliñwi, mwa naha yetuna yeneli mwa butanga bo butuna, nekuna ni bana babañwi ba Siheberu be lu ziba kuli ki bo Shadrecki Misheki ni Abedinego. Mi za taha fa sibaka fo ne bana ni kueza buiketelo, mi sesiñwi ne si na ni kuezahala. Nebana ni... Haili—haili—haili tumelo ya bona ne ibeilwe fa muliko.

<sup>39</sup> Mi haiba tumelo ya hao ilikiwa, konakuli usike wa wa. Pila hande ni so lumela.

<sup>40</sup> Mi cwale tumelo ya bona ha ne ibeilwe fa muliko. Mi ba kena mwa hola yesabisa. Ne ba si ka fita fela mwa—mwa libunda la mufuse, kono ne ba keni mwa ondo ya mulilo. Kono Satani a palelwa ku ba bulaya, kakuli mulelo wa Mulimu no si ka talelezwa kale. Ba kena mwateni ni sepo ya kuli, “Ni ziba kuli Muliululi wa ka wa pila!” Ba kena mwateni ni sepo ya kuli, “Lu sepile kuli Mulimu wa kona ku lu lamulela kwa ondo ya mulilo ye, kono, nihakuli cwalo, haluna ku kubamela siswaniso.”

<sup>41</sup> Satani na si ka ba nga. Na si ka nwelisa Nuwe mwa muunda, kufitela mulelo wa Mulimu u fela. Na si ka cisa bana ba Siheberu ka mulilo, konji pili mulelo wa Mulimu ha u to talelezwa. Na si ka bulaya Jobo ka limbongola ni matata, konji mulelo wa Mulimu ha u to felelela. Ni zona litau ne li si ka mu ca Daniele, konji mulelo wa Mulimu ha u talelezwa. Nihaiba lifu ni bucembele ne ni li ka nga Abrahamana, kufitela mulelo wa Mulimu ha u talelezwa.

<sup>42</sup> Mi mane halikoni ku mi nga, kamba nihaiba ku ni nga, konji mulelo wa Mulimu, wa bupilo bwa luna, u fela. Kacwalo, lu kopanela kulo koo, ni susumezo.

<sup>43</sup> Mi kiñi Mulimu ha lumelezanga matata kutaha? Mulimu u funganga matata, ubeya mihala mwa milomo ya ona ni kuli a Mu utwe, mi kipeto matata ani alutisa mwa kutwano yetuna ni Mulimu.

<sup>44</sup> Nekusina nambwamutalati konji muunda ha u to taha. Kono kasamulaho wa Nuwe ha to kenyiwa mwa buino bwani bwa na li ku bona, kuli a cimbauke ka mazazi a mashumi amane ni masihu, mwa liñungwa, mi areka yenyinyani yani inge i cimbauka fahalimu ni fafasi fa mezi; neli kasamulaho wa kufela kwa muunda, ha na ti lo bona nambwamutalati ka nako yapili, bulikani bwa sepo, bulikani bwa sepišo. Kasamulaho amano fita mwa nyandiso, mi kona a bona sepišo.



45 Cwalo kona mo mu bonela sepiso, ha se mufitile mwa manyando. Ni lata toko yani, kamba pina yetwi:

Kikuli Ni lukela kuya kwa hae kwa Lihalimu  
 Fa mumbeta o bunolo wa lipalisa,  
 Kanti babañwi ba lwanile fa kufumana  
 mupuzo  
 Ni kufita mwa mawate a mali?

46 Lu kupanga mbombolelwa ni kozo. Mulimu u lufa lika zende Za kona ku lufa: miliko ni manyando. Zeo ki zende kufita mbombolelwa ni kozo. Mbombolelwa ya luna i mwabuse fela bwa nuka.

47 Neli ka nako yene ba kenyzwe mwa ondo ya mulilo bana ba Siheberu, ku iliñwi ya miliko ya bona yemituna hahulu, fo ne ba ti lo bonela Alimuñwi yaswana sina Mwana Mulimu inza yemi mwahala bona. Matata a bona a tisa kuli Mwana Mulimu ayeme mwahala bona, mwahala kufuka kwa moya, kuli ukasheze kwahule moya o futumala. Kono no si ka taha konji pili ha ba yo kena mwa mulilo Mutiisapilu kona ha to bonahala.

48 Neli Daniele ya na itamile mwa pilu ya hae kuli haana ku isilafaza ni lika za lifasi, mi a hapelezwa kukena mwa muliko, kamba na ka lapela ku Mulimu kamba kukena mwa musima wa litau. Kono neli kasamulaho wa ku koteza mulilo, mi a nepelwa mwa musima wa litau, kuli, kasamulaho wa fani, a bona Lingeloi la Mulena inge liyemi mwahala hae, kubeya kwahule, Siita sa Mulilo sani inge si yemi mwahala hae ni litau. Mi litau ne li palelwa kufita ku yena, kakuli na fitile mwa maswenyeho ni miliko ni matata. Mi a ziba kuli Mulimu na kona ku mu lamulela kuzwa ku zona.

49 Ne li Abrahama, kasamulaho a bona mubu uba otokwile mununo, mi kwataha linanga, mi Lota a ikauhanya kwateni ni kuyo pila hande mwa lifasi. Neli kasamulaho amano utwa ma waine ni kuliloka kwa—kwa balisana ba hae, kusina bucwani bwa likomu za hae, kono ha inelela mwa naha yana mu file Mulimu kuli a yambaele ku yona. Mi ka lizazi lani, kasamulaho amano likiwa kufitela—kufitela tibeledo ya hae ifita kwa maungulo, neli ka lona lizazi lani kuli, kasamulaho wa kufela kwa muliko, a bulela pata ni pata ni Elohim mwatasa kota ya oke zazi lani. Neli kasamulaho wa kunyanda matata a hae, hana sa fitile ku ona, kuli Mulimu a to bonahala ku yena mwa sibupeho sa Muuna; ni kuina fani ni ku mu bulelela kuli na nyezi ni kuli libizo la musala hae neli Sarah, ni kubulela kuli na Mu sehile, mwa tende kwa mulaho. Neli kwani koo Abrahama ha Mu biza kuli “Elohim.” Neli kasamulaho wa muliko ni manyando.

50 Oh, kambe Keleke neika zuha fela ku za Yona kacenu, kufumana kuli kasamulaho wa matata ni miliko, ni kusehiwa ni ku boniwa bukuba, ili lika zeo Keleke ifitile ku zona, yona

Keleke ya pentekota; kuli lu bona Mulimu mwahala luna, ha eza lisupo zetuna, ni ze komokisa.

Kasamulaho wa kuikataza ni matata a lizazi,  
Kasamulaho wa kufela kwa zona kaufela,  
Mi lu ka bona Jesu kwa mafelelezo.

U ka ni libelela,  
Jesu yomunde mi wa niti,  
Fa lubona lwa Hae lolunde,  
Uka lu amuhela kwa Hae  
Kasamulaho lizazi limano likela.

Ha isali musihali, ha lu ikatazeñi lusebeze.

<sup>51</sup> Ona baana babatuna ba kaufela, baba kona kunga lisebelezo za luna za kakusasana, kukena ku za kubulela cwalo. Ba fita mwa miliko, mi ba bona Mulimu. Ne ba fitile mwa miliko, ni kubona Mangeloi. Ne fitile mwa miliko; ni sinulo, mi ba bona lisupo ni ze komokisa, ni lika zeñwi.

<sup>52</sup> Kono, oh, hakuna ni yomukana wa bona yana boni za na boni Jobo. Baana bani kaufela, kasamulaho wa kubona Mangeloi, ni kubona Mulimu ni lika ze kaufela, ne ba si ka bona sika kaufela sa ku bafa sepo ye sa bonahali mwa kuzwela mwa libita. Kono Jobo a bona zuho! A bona Zuho. A bona nto ye tabisa pilu kaufela. Mi cwale ha ma no libona ali, “Mawe kambe manzwi aka aka ñolwa mwa buka! Mawe kambe aka ñolwa ka siñoliso sa sipi, a falaulwe mwa licwe!”

<sup>53</sup> Mwabona, ki, lika kaufela ne li mu fetuhezi. Za hae, neba batanga ba hae ne ba sa mu bulelisi. Musala hae neli muenyi. Aina ona fani, fa libunda la mufuse, ona muliko tuna wani. Mi keleke ya taha, mi ba mu fulalela, ka mazazi a sebene. Mi hakuna mutu yana mu ombaomba!

<sup>54</sup> Kona kuli na lukela kubona pono ya Zuho, ha to huwa kuli, “Ni ziba kuli Muliululi waka wa pila, mi ka lizazi la mafelelezo U ka yema mwa lifasi. Na ziba! Mawe kambe manzwi aka a ka ñolwa ka siñoliso sa sipo, mwa licwe, kambe manzwi aka asike a libalwa ni hanyinyani, kakuli Ni ziba kuli Muliululi wa ka wa pila! Na ziba! Na ziba!”

<sup>55</sup> Ki sikamañi so ziba, Jobo? “Ni ziba kuli Muliululi waka wa pila.” Kana mu lemuhile, isiñi kuli nekuna ni ya Na pila, kono Nali yena Muliululi ku Jobo!

<sup>56</sup> Oh, kufuyolwe Libizo la Mulena. Ni tabile hahulu kuli Ni wa siemba sa Zuho, kuli Ni wa siemba sa zuho yani! Mi lu siemba sa teni kakusasana cwana, kakuli mwahali ku luna kupila zuho yani ya Bupilo (bwa kuli, lu bo muca sanda) bone bu tisize Zuho. “Ni ziba kuli Muliululi waka . . .” Ki sikamañi so ziba? Ha ni nuhi fela ka zona; luna ni kunuha kokuñata hahulu kacenu. “Na ziba Muliululi waka wa pila!” Eeni, sha.

57 Cwale Na li sikamañi? Haiba Na pila, Na li Muliululi ku Jobo. “Waka,” ya mupaka, *waka*, “Muliululi waka wa pila!”

58 Mi ki sikamañi hape so ziba, Jobo? U boni sikamañi mwa pono yani? “Ni kuli ka lizazi la mafelelezo, Uka yema mwa lifasi. Mi ni ha likokwani za mubili lika sinya mubili waka, ibo Ni ka bona Mulimu ona mwa mubili woo, Yo Ni ka iponela ka meeto aka. Na ziba Muliululi waka wa pila, mi Uka yema mwa lifasi ka lizazi la mafelelezo. Ni ha ni ka shengunuka mwahali kuna, kamba likokwani za mubili ona mabuku asinye mubili waka, ibo ku ona mubili oswana wo Ni ka bona Mulimu.” Mwahali mwani nekuna ni pono yetuna.

59 Daniele na boni Lingeloi. Bana ba Siheberu neba boni Mwana Mulimu. Nuwe na boni nambwamutalati. Abrahamama na boni Mulimu, pata ni pata. Kono, Jobo na boni zuho, Jobo na talimile kwa pili. Bashemi ba kale kaufela ni babakenile babatuna, ba Bibebe, atalima kwapili kwa lizazi lani; ka sepo, ka lipono za bona, ka lisinulo za bona, kuli ne ku ka taha nako ya zuho.

60 Cwale lu bona misebezi yemituna ye sweli kuezahala. Lu bona mata a matuna a Mulimu. Lu bona lika zetuna za Na eza. Hamukoni kutalima fa lizazi ni—ni kuziba kuli ha ki Mata a Mulimu atisa kuli lifasi lipotolohe lizazi. Hamukoni kubona nako ya mbumbi haitaha kuziba Mulimu. Mwakona kubona foliso ya meeto a kubofu, lizebe za bo shushu, kuziba kuli ki Mulimu. Kono kucwani haiba zeo kona ze liteni fela, mi kasumulaho lu ma no shwa ni kuikela? Kono ki zuho, ki Zuho, oh, zani kona ze ne kwalile lika kaufela za kile a sepisa Mulimu, neli zuho.

61 Mi kuna ni kuba ni sifapahano, mu si kaba kale ni zuho. Mi Keleke isika bona kale Mata a zuho, Ni si ka bona kale bulumiwa bobunca bo bunga sibaka, u si ka kena kale mwa silikani sesinca ni Mulimu, ku lukela kuba ni kuitaleka ili wena fa sifapano kuli kutahe zuho. Lu lukela kushwa kwa neku la milelo ya luna, kushwa kwa linzila za luna, kushwa kwa lika kaufela ze lu beile mwahali, lufite mwa miliko ni manyando, kuli lukone kubona zuho yenca, ili Bupilo bobunca. Muezalibi a si ka ba kale Mukreste, ku lukela kutaha lifu, kona kutatama zuho.

62 Kale Abrahamama a si ka bona Elohim, nekuna ni kuba myaha ye mashumi amabeli ka a ketalizoho a muliko. Bana ba Siheberu ba si ka bona kale Mwana Mulimu, nebana ni ku kena mwa ondo ya mulilo. Daniele asika bona kale Lingeloi, na keni pili mwa musima wa litau. Jobo asika bona kale zuho, nana ni kukena pili mwa kulatehelwa ki lika kaufela zana luwile; kono niteñi, ka pono, a bona!

63 Mi haiba Jobo ka pono na yemi ka kutiya hande ka sepiso, luna lu lukela kufita kai ku ze lueza, kasumulaho Kreste a zuha kwa bafu ni kuba Miselo Yapili ya bene ba lobezi, mi a luma

Moya o Kenile kuba liswayo la sepiso, fahalimwa luna, kuli ni luna lu pile. “Kakuli Na pila, ni mina mu ka pila cwalo!” Ka kubona Kubateni kwa pata ya Hae mwahala luna, inza beleka, ka kueza lisupo zeswana ni ze komokisa za Na ezize mwa lifasi, ku lufa sepo. Mi lu taha kwa zuho, mi lusiale fa libunda la luna la mufuse? Ha lu zweni fa libunda la mufuse kacenu, ka pono yenca, ni Mata a manca, ka ciseho yenca ya kuli lubona Mulimu mwa Mata a Hae. Lu bona zuho ya lika ze sweli kutaha.

<sup>64</sup> Lu kwa nako ya lifu. Lu inzi mwa minyako ya lifu. Linaha li inzi mwa minyako ya lifu.

<sup>65</sup> Russia ifumani silemano se sinca cwale, sina kaufela mina ha mu utwile fa silimba ni lika zeñwi. Ha ba lukeli kutaha kwanu ni ku to li tunyiseza mwa halimu ka ndalamiti. Bakona kutisa fela nto yenyinyani kwanu, ni kufita mwahala matwela ba bona, ni ku hasa musili olikani fela mwa naha, mi kipeto mutu kaufela u felelwa ki mata ka liholo ze twenti-foo. Ha yo kuta, kuli a zuhe, ufumana kuli kuna ni mutu wa mu Russian yasweli ku ku lahaka kwa makupo, mu Russian mulibeleli ya to hapa lapa la hao, abapalise musala hao, u lelekela bana ba hao mwa mukwakwa, ni kunga lapa la hao. Bakona kueza cwalo. Habakoni ku latehelwa ki nto iliñwi. Bana ni yona. Hakuna ya ziba kuli ki nto mañi. Mwabona, lika kaufela inge li beleka hande. Cwale kuitusisa zona mi kusina ku li saba, kakuli hakuna yana ni zona.

<sup>66</sup> Ha lu zibi mo li ka tela, ze ka ezahala. Kono luziba nto iliñwi, ya kuli luinzi fa libunda la mufuse. Naha, i inzi fa libunda la mufuse. Lifasi li inzi fa libunda la mufuse.

<sup>67</sup> Mi bakeñisa kuli lifasi li inzi fa libunda la mufuse, Ni tabile hahulu kuli Moya wa Mulimu wakona kutaha, mi lukona kubulela kuli, “Ni ziba kuli Muliululi waka wa pila, mi ka lizazi la mafelelezo Uka yema mwa lifasi!” Zazi leliñwi Uka taha! Ki kabakaleo muloki na ñozi kuli:

Kupila, A ni lata. Kushwa, A ni pilisa.

Kupumbekwa, A lwala libi zaka.

Kuzuha, A ni lukulula kuyakuile.

Zazi leli Uka taha, oh, ki lizazi la kanya!

<sup>68</sup> Ne ku lukela kuba Getsemene, kwa kulota kwa Mali kuli azwe mwa litalo la Hae, kusikaba kale sani. Mi ne si lwezi manyando a maswe fa Kalvari, kusika taha kale bupaki bwa Mulimu wa Kuyakuile Ya kona ku zusa bafu. Ne si lwezi—ne si lwezi Getsemene ni Kalvari, kuli kube Zuho. Kaniti ne li eza ona cwalo.

<sup>69</sup> Kuli baapositola bani, ona kakusasana wani, hane ba zwafile hahulu, kufitela Pitrosi ali, “Ni zwafile hahulu, Ni lumela kuli Ni ka kutela fela kwa kuyamba hape. Ni ka kuta fela mwa mulaho. Na, Ni Mu boni.”

70 Ne ba na ni sepo yetuna, ni kulumela ni lika kaufela, kufitela kutaha hola ya lififi yani. Ki sikamañi sa na eza Mulimu? Na sweli kutisa baapositola bani fa libunda la mufuse. Na sweli kubatisa fa sibaka ko ba kaba ko ba kaba ni tumelo yabona ye pakilwe hande kubona.

71 Mi Pitrosi ali, “Ni—Ni Mu boni haeza limakazo zetuna kwani kwa Galilea. Kono, oh, U inzi kwahule, u shwile, mi u batile, mwa libita! Ni lumela kuli Ni ka shetumuka kwa liwate kakusasana ni yo cimbeke fela kanyandi, ni kuya fela kwa kuyamba. Mwendu Na kona kutalima mwabuse bwa liwate, mi Ni ka fumana. Na hupula ka ku Mu bona ha Na lu libelela kwa likamba. Ni lumela kuli Ni ka shetumuka fela kwani.”

72 Mi baapositola se bali, “Mwa ziba kana? Ni lumela kuli ni kaya fela ni wena.” Oh, nebali babande ka lilato. Ne ba lilile kufitela meeto a bona a luluha.

73 Mo lu zibela kuya mwa libaka zani! Mo lu zibela! Kaufela luna lwa ziba lika zeo.

74 Na hupula ha Ni beya mulatiwa mwa libita lani, fani fahalmiwa lilundu kwani, ze ne bizwa kuli Eastern, kamba neli mabita a Walnut Ridge Cemetery. Mo ne Ni lobalelize mbututu yenyinyani mwani! Mi Ne ni lilela fa lizoho la boma, kufitela, Na lila kufitela Ni palelwa kulila. Ne ni ezize lika kaufela ze Ni ziba. Kufitela, Ha ni nga tobolo, kulika kuipulaya, Nenili mwa nako ye cwalo. Mi neli ka yona hola yani, mwa sibaka nyana sani kwani, fa mañwele aka, kuli mane Mahalimu a kwaluha, mi Na mu bona inza yemi fa mwa mubili o sa shwi. Neli mwa hola yani ha Ni to utwa mazoho a hae fa maheta aka, ali, “Bill, ha mu li utwisisi. Lu mwa buino bobunde hahulu kufita wena.”

75 Mwabona, si lwala sifapahano. Si lwala kuluba kwa palisa, kuli kuzwe sende yende. Si lwala kulubiwa kwa bupilo, kuli kuzwe lika zende zeliteni ku yona. Leo kona libaka Jesu hana lubilwe, kuli kuzwe kutahe sa Nali sona. Na sa koni kuyemela sifapahano, kuli, “Bulena kaufela mwa Lihalimu ni lifasi bu filwe mwa lizoho la Ka.” Kono kasumulaho wa sifapahano, Na yemi ni kubulela kuli, “Bulena kaufela mwa Lihalimu ni mwa lifasi bu filwe mwa lizoho la Ka!” Kono ne si ezize sikamañi? Ne si lwezi sifapahano pili.

76 Ne si lwezi kulubiwa ni kuswaba kwa baapositola. Ne ba boni Mupulusi wa bona, Yena yene ba lata, ni ku Mu bona ha zuha kwa bafu ni kuzwa mwa—kuzwa mwa libita. Ne ba Mu boni ha eza zeo. Mi hape ni kunahana, “Ki Yani ulobezi mwani, ubatile, mwa libita, Yena kasibili, kakusasana cwana.” Ne si lwezi . . .

77 Sicaba sani sene si Mu bona ha kwalula meto a libofu, ba Mu bona inza yemi fani ha lemaha milelo kaufela ya lipilu za sicaba, “Kana Na li ziba cwani,” ne ba bulela kuli, “kuli ne ba Mu taha mwa mulaho? Kana Na li zibile cwani? Kiñi ha Na sa

zibi kuli Judasi, Judasi uka—uka Mu beteka? Kiñi ha Na si ka ziba kuli masole neba taha fahalimwa lilundu kwani, ni mabala ni mikwale ni lika zeñwi kaufela, kuli ba Mu swale, haiba Na kona ku lemuha milelo ya bona?”

<sup>78</sup> Mwabona, diabulosi na sweli kubelekela ku bona, ku ba beya fa libunda la mufuse, kakuli ne ba bata kufa bupaki bwa kuli “Na ziba.” (Isiñi kuli “Na nuha” kamba “mwendi ku cwalo.”) “Na ziba! Na ziba!”

<sup>79</sup> Mi muhupule, miliko yeo itiswa ku mina ka mukwa o swana, kuli musike mwa bulela kuli, “Kihande, mwendi Se si lukile, mwendi Liñolo le ki la niti, mwendi foliso ya Bumulumu ilukile, mwendi Moya o Kenile u lukile.” Kono ha muba ni kutwisiso yani ni kuzwa fa libunda la mufuse, mi muba ni sinulo ya Mulimu, ka kolobezo ya Moya o Kenile, mwa kona kuhuwa kuli, “Ni ziba kuli Muliululi waka wa pila, kakuli U pila kuna!”

<sup>80</sup> Pitrosi naize, “Ni ka ya kwa kuyamba.” Baapositola ne baize, “Ni lumela kuli Ni kaya fela ni wena.” Mi ne ba inzi fa libunda la mufuse, kwani mwahala liwate, ni butata inge buezahala mo ne kuinezi. Mi Ni utwa yomuñwi wa bona hali, “Oh, ne li ka ezahala cwani, Pitrosi? Kukona kuba cwani kuli Muuna ya cwalo yani a shwe? Cwale Na ka beiwa cwani mwa libita sina mwa Na beezwi cwalo? Na ka itulela cwani kuli A kwelakiwe mati kwa sifateho ni ku mu kumaula milelu ya hae, kubeya mushukwe wani kwa toho ya Hae? Na ka eza cwani zeo, oh, mi niteni abe Mulimu? Ha ni koni fela ku li utwisisa.” Oh, ha ki kuswaba ni kafoo!

<sup>81</sup> Mi kipeto hañi hañi fela, ne ba talimezi fa likamba, ki mufuta fela o swana wa sinulo yana amuhezi Jobo, kwani ba bona sa na boni Jobo ka lilimo ze likana sikiti kwa mulaho. Fani ne kuyemi Muliululi, yapila mi yo munca, ali kuyema fa likamba. Ni mulilo o tumbukile, ni tapi ye besizwe ku ona cwalo, mi ali, aba mema.

Jesu una ni tafule ye tomilwe  
Fo kucelwa ba bakenile ba Mulimu,  
U mema sicaba sa Hae se si ketilwe uli “Mutahe  
mu to ca;”

Ni manna ya Hae wa ba fepa  
Mi ubafa lika kaufela;  
Oh, ki, bunde kuca ni Jesu ka nako kaufela!

Mo lukona ku nanahela ka zeo, mo li ngezi lika zetuna zani!

<sup>82</sup> Kuli mane ni . . . Paulusi yena muapositola, yena muapositola yomutuna yani na fitile mwa nako ya butata ha na iponezi ka bupaki kwa lifu la Setefani; mi abona sifateho sa hae se sinyinyani ha si talimela mwa Lihalimu, mi macwe inge asweli ku mu nataka kwa sifateho, mi atalima mwahalimu ali, “Ni bona Lihalimu ha li kwaluhile. Ni bona Jesu ayemi kwa lizoho la bulyo la Mulimu.” Naize kuli, “Mulena, u si ke wa beya sibi se ku bona.” Mi Paulusi ki yena ya na sweli liapalo, sani ne si mu beile ka lisunda ni lisunda fa libunda la mufuse, kuya kwa mulaho ni kwa

pata; kufitela, munahano wa Hae ha u tinyeha, kufitela aba mwa musipili wa hae kuliba kwa Damaseka, ka kulika kulwana mwa nzila ya hae kaufela, sina mutu yaya kwa kunwa bucwala mwa botela, yalika kuhatelela matomola a hae.

<sup>83</sup> Nali mwahala zani kaufela, ha ku to taha Linzwi kuzwa kwa Lihalimu, Liseli lelituna lelibenya lali, “Saule, Saule, kiñi so Ni nyandiseza?” A Mu bona. Na Mu lemuhiye, kuli Na li yena Jesu ya zuhuile, ili Yena yana pakile za kushwa kwa hae, na zusizwe hape.

<sup>84</sup> Oh, Na hupula bupilo bwaka tota, fa musipili kuya kwa sinyeho, ha Ni utwa Linzwi lelinde hakalo, “Kina Jesu. Ne ni shwile hañwi, Na pila hape kuyakuile. Kakuli Na pila, ni mina muka pila hape.” Kuzwa ka nako yani, nibeya lizoho laka ku Yena, Ni Mu sepile mwahala libaka zensu. Ha ku taha linako ze Ni palelwa kubona, ka nzila ye Ni ya, Ni sa Mu sepile.

<sup>85</sup> Mukreste kaufela wa mulumeli yana ni kukenyiwa mwa miliko yeo. Mukreste kaufela una ni kubeiwa fa libunda la mufuse, kuli azwe fateni ana ni kutwisiso, “Ni ziba kuli Muliululi wa ka wa pila!”

<sup>86</sup> Ha lu si ka taha kwanu kakusasana cwana kuto ina fela ni kuambola fa litaba zeñwi za kale, mane zeo kaufela ki niti, kono lu tile kwanu ni bupaki kakusasana cwana, “Ni ziba kuli Jesu Krete ki Mwana Mulimu, Ni ziba cwalo kusina nihaiba kukakanya! Ni ziba kuli Na zuhile kwa bafu, mi Wa pila mwahali ku na kacenu. Ki waka mi nina Ni wa Hae. Ni ikabela lifa ni Yena, mwa Mubuso wa Mulimu.”

<sup>87</sup> Zuho! Zuho itisa lika zende, yeo ki zuho, ili sepo yenca. Kana una ni yona kakusasana cwana? Kana li mwa pilu ya hao nji? Kana uziba kuli Muliululi wa hao wa pila, mi U eza lika kaufela kubeleka hande hamoho?

<sup>88</sup> Mu li, “Muzwale Branham, Ni inzi fa, ni libelezi mukoloko wa tapelo.”

<sup>89</sup> Mulimu ubeleka zeo ka bunde fela. Kiñi musizana yomunde yomunyinyani yani, zazi leliñwi, ha na natilwe ka bubofu ha pepwa fela? Neli kuli Mulimu ange kanya ni kufetula muleneñi fafasi. Luli, Mulimu wa ziba Za sweli ku eza. Mulimu wa ziba. Mi U lu beyanga fa libunda la mufuse, kuli alu bonise kanya ya Hae.

<sup>90</sup> Kacwalo, kakusasana cwana Ni bulela cwana, mulikani. Kasumulaho wa lilimo ze mashumi amalalu ka silisimu sa bulumiwa, kasumulaho wa lilimo ze mashumi amalalu uni silisimu za manyando mwa simu, Ni bata kubeya bupaki bwaka ku se. Ni boni ze swabisa. Ni boni linako ze Ni kupile lika, ni kulila kubata lika, ni kukupa lika, mi na palelwa ku li fumana. Kono haiba Ni kona kulibelela fela ku Mulimu, kona kuli Ni ziba kuli li ka beleka fela ka kuluka, lika taha fela ka kuluka, u ezanga fela lika ze lukile.

<sup>91</sup> Ha Ni timelelwa ki mbututu waka, Sharon waka yomunyinyani, Na...yani neli nto yene ni sitatalisize. Se nili, “Ze likona kuba cwani zende? Likona kuba cwani zende?” Mi likweli kasamulaho, ha Ni mu bona inza yemi fani mwa bunde bwa musizana yomunyinyani kalibe, inza ambola ni na, inge ayemi bukaufi ni moya ye ne sinyehile yani, kafani. Na ziba, haiba na lumezi, na ka taha ya maswe. Mulimu nana ni ku munga inge asali yomunyinyani mi yomunde. Ni ziba kuli Ni ka mu bona hape. Ni ziba kuli Ni ka mubona, Ni ziba kili lifitelezi muluti kaufela wa kukakanya.

<sup>92</sup> Ni hupula musala ka wa lilimo ze mashumi amabeli ni zepeli za kupepwa, angiwa, inge asali fela musizana, me yomunyinyani kwani. Mi mapepa a mitende hana ñozi toho ya taba fateni, “Me wa mwanana, mukutazi... , u shwile,” oh, pilu yaka mo ne ikatazehezi! Ne ni sa zibi sa kueza.

<sup>93</sup> Kono kacenu Ni ziba kuli kaufela zani ne libelekela fela kwa bunde. Ni ziba kuli bupilo ne buna ni sitiwa, ni ku bondololwa, ni ku hamulwa, ku zusa zeneli mwahali a bona, kuli zwiseza fande. Nekuna ni bo Branham babañata mwani, bene ba hamuzwi mwateni Mulimu a si ka i tibahaza kale ili Yena.

<sup>94</sup> Nekuna ni zeñata hahulu za mina ku mina, kufitela Mulimu ha li hamulela kwande, ka miliko. Mi cwale kuhamuliwa kwani hane ku ezahala cwalo, ku tata. Kono kamulaho nyana, lihalimu la apuha, mi mubona mulelo wa Mulimu. Mi kipeto mwa huwa muli, “Ni ziba kuli Muliululi wa ka wa pila, ni kuli ka lizazi la mafelelezo U ka yema mwa lifasi! Ni ha likokwani za mubili mabuku lika sinye cwani mubili waka, ibo ki kuona mubili waka mo Ni ka bona Mulimu!” Miliko nyana yenyinyani ye ni lika zeñwi ki za nako nyana fela, mi za yonga ni kufela. Kono li ezwa fela kwa bunde bwa mina, ha lu hupuleñi cwalo, kuli Mulimu a amuhele kanya.

<sup>95</sup> Ha lu inamiseñi litoho za luna fa nako nyana. Ni bata kubuza, lusika lapela kale, kana kuna ni yomukana mwahali mo ya tabela ku hupulwa mwa linzwi la tapelo lu si ka kwala kale? Mulimu aku fuyole. Ki ba bakai mwahali mo baba ka li, “Ni bata Mulimu, mwa hola ya muliko waka cwale, ku ni fa kutwisiso yenca, kuli Ni tahe sinca hape”? Mu nanule mazoho a mina, muli, “Ni bata—Ni bata kuli ye ibe zuho yaka, kuba Zuho, ye ka ni zusa mwa sepo yenca ni mata amanca, buiketo bo bunca ni tabo yenca.” Mulena ami fuyole, sicaba saka sesinde.

<sup>96</sup> Oh, Mulimu waka ni Mupulusi wa luna, lu itumela hahulu ku Wena kwa Zuho ye, ka zeo italusa kwa lipilu za luna. Mi ka tumelo, kwabuse kwani, mwabuse bwa naha, lwa kona kubona Kutaha kwa Mulena, Jesu, ha Nza itukisa Iliyena cwale, inza apezi liapalo za Hae za bulema. Mi, Keleke isweli kuapala, Munyali usweli kuapala sapalo sa Hae sa sinawenga. Kuna ni mukopano omutuna olibelezi kunga sibaka cwanoñu.



<sup>97</sup> Libunda la mufuse le halikoni kuyema ko kusafeli. Ha lu utwa sicaba se inge si seha cwalo, ni ku lu bona, ni ku lu ziba ka libizo le li maswe lani kuli “bapikuluhi babakenile,” ni ku lu bona bukuba, ni kubulela kuli mane ha lu si kaiketa hande mwa litoho, oh, halikoni kuina nako kuufela, Mulena. Kono halubeñi sina Jobo, luswale bupaki bwa luna, halubeñi sina Daniele mwa musima wa litau, kamba bana ba Siheberu mwa ondo ya mulilo, kamba Abrahamama mwa musipili wa hae.

<sup>98</sup> Lu tuse, O Mulena, kuli luyeme ka kusepahala kufitela lubona nto yetuna yani inga sibaka, “Mi tolombita haika lila, mi baba shwile ku Kreste ha ba ka zuha; luna baba pila mi lusiya lu ka cinciwa, mwa nako nyana, ka kukobya fela kwa, liito.” Mi kona ku ka taha Zuho yani ku luna, yana ikozi Kreste lilimo ze mianda ye naintini kwa mulaho kafoo kakusasana cwana, ni ali, “Kakuli Na pila, ni mina mu ka pila cwalo.”

<sup>99</sup> “Yena Jesu ya swana yoo, yana ngile kuzwa mwahala luna, uka kuta sina ka mukwa Wai le ka ona.” Lu ka Mu bona, mane niheba liñiba kaufela mwa lizoho la Hae ni muutwa kaufela kwa toho ya Hae. Lu ka Mu bona.

Oh, Ni ka Mu ziba, Ni ka Mu ziba,  
Mi ni liuluzwi Ni ka yema bukaufi ni Yena.

<sup>100</sup> Eehe, Mulena, pilu yaka yenyinyani, sian mubili o tokwile mata waka wo haukala kuobama bakeñisa lipilaelo, minyaka ni lipilaelo za masimu a kutuliwa, misebezi ya mwa masimu, ni za kupahama ni kuzuha, ni ku sa utwana mwahala bakutazi baba sina likute, ni zeñwi cwalo, mwabuse bwa sibaka, ni sicaba inge si soma, ni mata a maswe. Kono, O Mulena, zazi leliñwi lutaha sina Elia, kwa nuka; luka talima mwabuse, kupaniwa kwa sicacani kaufela, koloi ya mulilo ika to lu shimba. Ha lu zibeñi fela kuli mabunda a mufuse a ki lika ze lu pata fela kwa sika saluli se sili kwa pili, yona kanya yetuna yani.

<sup>101</sup> Lu pile baba sepahala sina Jobo, kufitela lukona ku Mu bona, pata ka pata. Mi lube ka kusepahala sina Mulena luna mwa na bezi, ka kuba mutala wa luna, kuya kwa Kalvari; ni yena, lu itukiseze kutakiswa, mi lu kokotelwe ni Yena, kuli kube zuho ya bupilo bwa luna. Lumeleza cwalo, Mulena.

<sup>102</sup> Mi, haiba kuba ni basomi kaufela mwahali mo, ne ku na ni sina Paulusi wa kale, baba seha, bao ha ba fumane Zuho fa musipili wa bona habaya kwa mandu a bona kakusasana cwana. Lumeleza cwalo, Mulena.

<sup>103</sup> Lwa lapela, Mulena, kuli bani babali fa libunda la mufuse, libunda la mufuse wa matuku, kuli ye ikaba yona hola ye ba ka liululiwa.

<sup>104</sup> Maabani busihu, ne ni ambola ni musali yani kwa sikocikala sa mota, ni muuna hae; kuli kwani kwa Phoenix, mwa buino bo butuna, ni ma kansa amatuna ani inge aipundekile ku bona, mi cwale kacenu u iketile hande mi u folile. Mi mbututu

yomunyinyani yana ka zwiswa pilu ya hae, uteni mwa muyaho mo busihu boo, uiketile, hande. Mushimani yomunyinyani wa sibofu yana zamayanga mwa lififi nako yeñwi mi asa boni liseli la musihali, wa zamaya kacenu mi wa iponela liseli la musihali. Mi, O, Mulimu, mo lu itumelela ku Wena ka se! Mi kaufela zona ki kutalimela kwabuse bwa lisila, kwa lizazi lelituna la zuho lani. Lumeleza cwalo, Ndate. Mi ha ba zibe kuli lika ze nelina ni kuba ona cwalo, kuli ba: mushimani yomunyinyani wa sibofu wakona kubona, kuli mwana yomunyinyani yana kula butata bwa pilu akone kufa bupaki ku babañwi. Lika ze kaufela libelekisana hamoho kwa bunde ku baba Ku lata.

<sup>105</sup> Kaufela li ezizwe ka bunolo ku luna kakuli nekuna ni Alimuñwi yana ipile mwa muliko, nekuna ni Alimuñwi ya Na yemezi muliko, yani neli Jesu. Ili Yena Yana ipile luli ku Ndate, kufitela Ndate a Mu zusa mwa Zuho ya kakusasana cwana, kakuli ne ku sa konahali kuli A bulukiwe ki lifu. “Kakuli Hanina ku tuhelela ya Kenile Wa Ka kubona kubola, mane Hanina kutuhelela moyo wa Hae mwa sibaka sa baba shwile.” Kakuli, U fumanwi kuba ya sepahala, kamita na za eza ze tabisa Ndate.

<sup>106</sup> Mulimu, mi lube kamita baba sepahala kwa musebezi. Hakuna taba kamba miliko yaluna ni matata a luna a cwani, zeo kaufela, ha lu kone kubulela, kamita kuli, “Ni ziba kuli lika kaufela li sebelisana hamoho kwa bunde kubaba lata Mulimu.” Lumeleza cwalo, Ndate.

<sup>107</sup> Lu fuyola sicaba se kakusasana cwana ka limbuyoti za Hao. Ba tile ka kupakela kuzwa kwa libaka za bona, ba tile kwa tabernakele. Batile ku to fumana buiketo. Ha ba ye kwa malapa a bona kakusasana cwana, ka Mata a Moya o Kenile inza tuka mwa lipilu za bona, ba zamaye mwa linzila sina bani bene ba zwa kwa Emausi, bali, “Hanili lipilu za luna ne li tuka mwahali ku luna, ha Na sweli kuambola ku luna mwa nzila?” Lumeleza cwalo, Ndate. Ni ba beya ku Wena cwale, ka Libizo la Mulena Jesu Kreste. Amen.

Ku lukile, Muzwale Neville. Mi cwale muhupule lisebelezo.

<sup>108</sup> Haluna kuba ni makadi a litapelo kakusasana cwana, bakeñisa kuli, haiba luna ni makadi a litapelo, haibile fela Ni ba ni sicaba se inge siyemi cwalo, Ni ka itinga fela fa mpo yani. Ni lukela kuba ni sibaka kufitela Ni beya zeo kaufela kwatuko, ko Ni kona kuzwela kwande kwanu ni kukona kuba. . . Na saba. Ni ikutwa kuba ya saba, mi Na saba kuli Ni ka eza mafosisa. Ku luza ndwa, ha ki ku luza ndwa. Patton na luzize lindwa zeñata nyana, kono na si ka luza ndwa ni ye kana. Yeo ki niti. Mi luka luza lindwa zeñata hahulu, ni luna, kono haluna ku luza ndwa ni ye kana. Ni ka ba ni mafosisa amañata hahulu, kono Hanina ku luza Musebezi. Ki Mulimu yana ifile, mi Mulimu uka u babalela. Ki—ki tozo. Mi cwale seli nako, Ni lumela kuli hola ifitile, mi Na kalisa, kakuba kuli ki Zuho lizazi la kacenu, Ni ka ya kwa—

kwa ni ka ya ona cwalo sina mo ne Ni lapelela bakuli. Mi haiba Ni kona . . .Ki tozo. Kuna ni se si lukela kuezahala ku na. Ha ni si ka itwaeza zeo. Li tahanga mwa nzila ye cwalo, Hakulata ha ni koni kulemuha lika hande fela, kono Ni lukela kuzwelapili ka zona kufitela Ni ziba hande ka zona mwa nako kaufela. Kacwalo le ikaba lona lizazi le Ni ka lika, ka sishemo sa Mulimu.

<sup>109</sup> Mulena ami fuyole cwale. Muzwale Neville. Mi lisebezezo li ka kalisa ka naini seti. Muzwale Neville.



*NA ZIBA* LOZ60-0417s

(I Know)

MUKOLOKO WA LIÑUSA LA ZUHO

Liñusa le ka Muzwale William Marrion Branham ne li kotalizwe lwa pili mwa Sikuwa la Sunda kakusasana hali pazula feela, Lungu 17, 1960, ili fa Branham Tabernacle, mwa Jeffersonville, Indiana, U.S.A., liingilwe kuzwa fa tepu ya magesi ya manzwi kusina ku zusa sika mwateni ku ya Sikuwa. Toloko ye ya mwa Silozi i hatizwe ni kuhasanyiwa ki ba Voice Of God Recordings.

LOZI

©2020 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitususwe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangeli ya Jesu Kreste. Buka ye hailekisiwi, kuatiswa mwa buńata, ku nepelwa fa moya wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)